

Pa colmo su composicionnan a cambia ambos corona

SAC a dedica Festival di Tumberito na Lionel Croes

ORANJESTAD (AAN): Tur aña 'Stichting Arubaanse Carnaval' (SAC), siendo organizado di e festival di Tumberito Infantil y Hubenil ta dedica e festival na un baluarte di e evento. E aña aki, a otorga e honor na Lionel "Rupi Rupé" Croes. Tecla Kelly, Presidente di SAC a entreg'e e plakkaat special, den cual ta honr'e pa su añanan di dedicacion y sosten na e festival.

E trayectoria di Lionel Croes den Festival di Tumberito a cuminsa na aña 1984 ora cu su mama, Lilian (Shi Preke), a oblig'e pa canta Ranchera. Y Lionel a gana e titulo maximo. Di eyman su omo Chinto Croes a compone un tumba pa Lionel Croes na aña 1985, "E Pato di Carnaval".

Y Lionel a konkista e corona di Tumba Infantil. Na 1986 Lionel a participa cu "Ta Mi ta e Guy" y a sali prome finalista, di eyman nan a sali rumbo pa Hulanda y na 1989 Lionel a participa den tur e Tumberonan grandi cu su cancion adapta pa Salsa y Sabor (musicnan Antiano) "Ta mi ta e Guy" y a konkista e titulo maximo, repre-

sentando su pais Aruba!

Na aña 1989 el a regresa Aruba y dia 2 di Februari 1990 a participa cu "E Trein di Carnaval" den seccion Hubenil y a konkista e titulo maximo.

Despues a cuminsa canta den Tumba Festival Grandi y danki na e maestro Harry Zimmerman, awe Lionel ta un propio compositor di tumba. Su prome tumba el a compone pa e mes "Carta pa La Reina" y di eyman a keda compone pa Festivalnan di Tumberito y hasta pa Festival di Tumba Grandi.

Lionel Croes su lema ta: "Si bo no por haci algo bon... No haci'e".

Den cada letra y melodia di su cancionnan e ta hinca hopi tempo y entusiasmo. E ta bisa di mester sinti su mes confortabel y cu e siguransa cu e ta un cancion cu por mishi un curason, asina su cancionnan ta sali!

SAC ta gradici Lionel Croes pa su sosten di semper y spera cu e dedicacion aki lo sirbi como un empuhe pa e por sigui yuda mas mucha y hobennan den e Festival di Tumberito Infantil/Hubenil den e añanan nos dilanti.

